



Georg Jäger, il portatore dei premi di cultura 2010.

FOTOS G. N. STGIER

Tge ritgezza culturala

Il chantun ha surdà 17 premis

DA GION NUTEGN STGIER / ANR

■ En las valladas grischunas fissan anc bleras personalitads che meritasan in premi, ha ditg cusseglier guvernativ Claudio Lardi a chaschun da la surdada dal premi cultural 2010 e dals premis da renconuschientscha e da promoziun. 17 persunas han gia gi quella onur cun retschaiver venderdi passà in premi. La surdada dals 17 premis venderdi sera conferma ch'il Grischun saja in chantun cun ina gronda multifariadad culturala. Quai haja el er vesì durant ils davos 12 onns sco cusseglier guvernativ e schef dal departament da cultura, ha ditg Claudio Lardi als portaders e las portadras dals premis 2010 ed als blers preschents en la sala dal cussegl grond. En il Grischun saja avant maun ina ritgezza remartgabla da cultura, ha accentuà il cusseglier guvernativ partent. Claudio Lardi ha engrazià a tut las persunas che s'engaschan per il bain cultural en noss chantun. El saja davai-ras losch da quella varietad.

Gualser cun corp ed olma

Il 38. premi cultural dal Grischun ha re-

tschet Georg Jäger, l'istoricher e perscrutader. L'um da Tschierschen che ha 67 onns ha studegià a l'Universitad da Turitg istorgia e germanistica. Il 1973 ha el cumenzà sco scolast a la scola chantunala ed al seminar a Cuira. A partir dal 1986 ha el reduci ses pensum tar quellas dus scolas per s'engaschar dapli per la cultura dals Gualsers en noss chantun. 20 onns è Georg Jäger stà in president cun corp ed olma per l'Uniun dals Gualsers. Durant quels dus decennis ha el er publitgà lavurs davart la furmaziun da l'identitad e la promoziun da la cultura dals Gualsers. Da la Societad per la perscrutaziun da la cultura grischuna è Georg Jäger stà il 1985 confundatur, vicepresident e gestiunari. Ses gronds meritis èn vegnids remunerads tar la surdada dal premi venderdi passà da Bernard Cathomas, l'antierur directur da Radio e Televisiun Rumantscha.

Persunas engaschadas

Il minister da cultura da noss chantun, Claudio Lardi, ha er surdà set premis da renconuschientscha. Quel premi vegn cunzunt surdà a persunas ch'èn stadas fitg activas en lur champs, saja quai lin-

gua, chant e musica, ubain teater etc. Dus dunnas dal intschess rumantsch han er retschet quel premi dotà cun 20 000 francs. Anna-Alice Dazzi ha retschet quel premi cunzunt per la lavur persvadenta en connex cun il svilup dal rumantsch grischun. Er l'activitad gronda da Corin Curschellas sco chantadura, cumponista, poetessa ed actura ha la regenza remunerà cun in premi da renconuschientscha. Josias Just tutga tar in dals megliers clarinetists da noss chantun ed è er sin champ naziunal in musicist da vaglia. Er l'um da 57 onns ha retschet in premi da renconuschientscha. In auter um che ha merità quel premi è segir er Felix Giger. Sco charedatur dal Dicziunari Rumantsch grischun ha el fatg lavur exemplarica. Nov persunas che paran dad esser sin la dretga via en lur vita culturala han survegñ in premi da promoziun en ina valur da 20 000 francs. Tranter quellas er dunnas ed umens dal intschess rumantsch. Quai èn: Arno Camenisch, Ines Caviezel e Roman Vital. Preschentà ils 16 portaders dals premis a sco adina en ina moda plagn vita Carlo Portner, il president da la cumissiun da cultura dal Grischun.



Quai er per Anna-Alice Dazzi.



Roman Vital, il cineast da Sent, ha retschet in premi da promoziun.



Cun chant e musica ha Corin Curschellas embelli la surdada dals premis.



Sunter il premi Term bel, in ulterior premi per Arno Camenisch.



Gratulaziun da cusseglier guvernativ Claudio Lardi (dretg) per Felix Giger.



Da Terzio Paganini gratulaziuns er per Ines Caviezel.